

02 MAY 1998

Sukom-Sukarelawan

SUKARELAWAN NADI '98 BOLEH KETAHUI TUGAS MEREKA MULAI MINGGU DEPAN

KUALA LUMPUR, 2 Mei (Bernama) -- Para sukarelawan yang telah menjalani kursus untuk menjayakan Sukan Komanwel ke-16 di sini, September ini, akan mengetahui tugas masing-masing mulai minggu depan.

Eksekutif Sumber Manusia (Pembangunan dan Latihan) Krishnan Kutty Nair berkata, pihak pengurusan Sukom Ninety Eight Berhad akan mengedarkan surat perlantikan itu kepada mereka selewat-lewatnya sebelum pra-Sukan Komanwel bermula, Julai ini.

"Kita telahpun selesai membuat pembahagian tugas kepada para sukarelawan ini untuk ditugaskan di venue-venue tertentu semasa Sukan Komanwel, September ini,".

"Dalam surat perlantikan itu juga akan disertakan cuti yang mereka boleh ambil menjelang sukan itu," katanya di sini hari ini.

Beliau berkata setakat ini sebanyak 18,000 sukarelawan telah dilatih dan baki 2,000 lagi akan menjalani latihan mulai bulan ini sehingga bulan depan.

Krishnan berkata sukarelawan Sukan Komanwel ke-16 yang juga dikenali sebagai Nadi '98 itu akan digunakan semasa pra-Sukan Komanwel untuk membiasakan mereka sebelum kejohanan yang sebenar.

"Sukarelawan ini akan berkhidmat semasa pra-Sukan Komanwel, Julai ini untuk membiasakan mereka dengan tugas masing-masing apabila kejohanan sebenar berlangsung," katanya.

Beliau juga berkata, lebih 10,000 sukarelawan dijangka menghadiri perjumpaan perdana dengan Perdana Menteri Datuk Seri Dr Mahathir Mohamad di The Mines Resort City, Sungai Besi, esok.

"Kita jangkakan 15,000 sukarelawan akan hadir, tetapi jika lebih 10,000 hadir pun...kita masih berpuashati. Pada perjumpaan itu, Perdana Menteri akan menyampaikan amanat penting kepada sukarelawan tersebut," katanya.

Dr Mahathir juga dijangka melancarkan pakaian seragam untuk sukarelawan Nadi '98, esok.

-- BERNAMA

ERE ZB